

7
TENTAMEN PHYSIOLOGICUM,
I N A U G U R A L E,

D E

C O R D E.

Q U O D,

A N N U E N T E S U M M O N U M I N E,

Ex Auctoritate Reverendi admodum Viri,

D. GULIELMI ROBERTSON, S. S. T. P.

ACADEMIÆ EDINBURGENÆ PRÆFECTI;

N E C N O N

Amplissimi SENATUS ACADEMICI consensu,

Et nobilissimæ FACULTATIS MEDICÆ decreto;

P R O G R A D U D O C T O R A T U S,

SUMMISQUE IN MEDICINA HONORIBUS ET PRIVILEGIIS

RITE ET LEGITIME CONSEQUENDIS;

Eruditorum examini subjicit

R O B E R T U S P E R C E V A L,

A. B. TRIN. COLL. DUB.

H I B E R N U S.

Soc. Med. Reg. Edin. Sod. Soc. Phys. S. H. et Praefes
Annus, et Soc. Chir. Med. S. H.

Ad diem 24. Junii, hora locoque solitis.

E D I N B U R G I:

Apud BALFOUR et SMELLIE,

Academiae Typographos.

M,DCC,LXXX.

Reverendo Viro

CAROLO PERCEVAL, A. M.

Patruo suo dilectissimo,

Prima haecce in re medica tentamina,

Animo beneficiorum haud immemori,

Lubentissime consecrat

A U C T O R.

TENTAMEN PHYSIOLOGICUM

I N A U G U R A L E,

D E

C O R D E.

P R O O E M I U M.

QUÆ de corde a viris claris proposita sunt, olim consideranti, multa mihi obversabantur in re medica momentosa, animoque naturae studioso perdigna; ita me laborem haud inutilem, minime certe injucundum, ~~me~~ suscepturum existimavi, si, inventis eorum usus, in leges quibus, motibus suis, obtemperat nobile illud viscus, inquirerem, et si exinde, usus quibus in oeconomia animali infervit, indagare aggrederer.

Ut melius autem procedat inceptum, necessarium videtur, brevem cordis sistere descriptionem, paucaque de
modo,

modo, quo, sub ipsa vitae primordia, formatur, deque diversa ejus, in diversis animalibus, structura, praemittere.

S E C T. I.

Cordis Descriptio.

COR humanum quodammodo prae se fert speciem coni, quem fere bipartitur planum ad basin normale. Ita nascuntur facies convexa et plana anatomicorum: Facies convexa ita inclinatur, ut, altera parte, margine obtuso, altera valde acuto, in planam terminetur: Accuratus inspicienti, apex bicollis est. Conus enim iste ex duobus conis minoribus conflatur, quorum alter, latere compresso, vicino incumbit. Horum uterque cavus est; cavitas *ventriculus* vocatur. Duo habet ostia unusquisque ventriculorum, alterum in canalem, *arteriam* dictam, alterum in saccum laxum seu *sinum*, basi cordis adnexum, hiat. Hic in angustiore finem, *aurem* quadrupedis referentem, arctatur: Ad sanguinem capiendum, ita ut pleno flumine in ventriculum immittatur, destinatus est; hinc interdum *atrium* nomine venit.

Cor,

Cor, in homine, transverse ponitur; cavitates igitur apte in *anteriores*, et *posteriores* distinguuntur. Antiqui, in sectionibus quadrupedum versati, has *sinistras*, illas *dextras*, vocabant; nomina, minus idonea, usu invaluerunt.

In describendis cordis partibus, commodum videtur sanguinis cursum sequi. Ille a toto corpore, pulmone excepto, per venas cavas deferitur ad dextrum cordis atrium. Conflatur hoc ex fibris muscularibus in ventriculi limen cellulosum defixis, et utrinque membrana forti coopertis. Auris major est quam in sinistro, musculisque lacertosis interstincta; margo crenatus; finis obtusior. Intus, qua sinistro atrio adjacet, *fossa* conspicitur *ovalis*, vestigium foraminis cognominis, et inferius, ad imum sinum, lunata valvula, *Eustachii* dicta, in foetu integerrima, in adulto interdum reticulata, rarius nulla.

Circa ostium ventriculi dextri, conici, in descriptione, compressi, infigitur velum membranaceum, in tres partes inaequales porrectum: *Valvulas* dicunt *triglochines*. A limbo hujus membranae oriuntur plurimi funiculi tendinei, qui inferuntur, partim in parietes ipsius ventriculi, partim in apices muscutorum cylindricorum a parietibus germinantium. Hae valvulae, versus atrium retropulsae, impediunt quo minus sanguis, dum systolen patitur ventriculus, in sinum retropellatur. Ne autem nimis laxatae

in

in atrio fluitent, cavent columnae musculosae, quae eodem, quo cor, tempore contrahuntur; per diastolen, parietibus ventriculi adplicatae, liberum concedunt iter sanguini, in cavum irruenti. Sanguis, post contractum ventriculum, qua data porta, in arteriam pulmonalem, prius membrana obtectam, ruit, reditûs nescius, ob valvulas semilunares. Harum figura satis apte a nomine designatur, nisi quod mediae curvaturae corpusculum innascitur, *Aurantii* dictum. Cum arteriae parietibus spatia intercipiunt, caecis versus cor finibus; tales autem sunt earum mensurae, ut explicatae ostium cordis perfecte claudant; foraminulam etenim in axi, ob convexitatem relictam, obturant corpuscula. Nullo autem modo resistunt undae corde expulsaе, cum facile ad arteriae parietes applicantur. Sanguis, cursu per pulmones peracto, defertur per quatuor plerumque venarum truncos, in sinum cordis sinistrum, fere cubicum, dextro multo minorem. Minor quoque est auricula, crenata, et inflexa. Ex atrio sinistro, sanguis dirigitur in ventriculum sinistrum, atque inde in aortam, eodem prorsus artificio ac in dextris cavis, nisi quod, ad ostium ventriculi, duae tantum numerantur productiones membranaceae, quae *mitrales* audiunt. Ex aorta, sanguis in remotissimas partes projicitur, rursus per venas cavas ad cor rediturus.

Interna

Interna ventriculorum superficies tota exasperatur jugis carnosis, quae, variis directionibus sese invicem decussantia, interstitia relinquunt reticularia.

Notanda est ventriculorum conica figura, omnium commodissima. Ita enim parietes sibimet appropinquantes in sanguinem agunt secundum directionem rectarum linearum ipsis normalium; hoc est, per motuum compositionem, in directione axis versus basin unde oriuntur vasa magna arteriosa.

Parietes sinistri ventriculi multo robustiores sunt quam dextri. Ratio patet. Minor enim est quantitas sanguinis in pulmone quam in reliquo corpore contenti; minor quoque renixus ob auxilia respirationis. Sinister ventriculus dextro paulo longior est, sed angustior, ita ut hic quasi $\frac{3}{4}$ contineat, ille $\frac{3}{4}$ * tantum. Dextra cava omnino oportebat ampliora esse quam sinistra, ut spatium concederetur sanguini per venas cavas redeunti, dum pulmo immeabilis est. Hinc, in extinctis a pulmone oppilato, ventriculus dexter saepius mirum in modum tumefactus deprehenditur; eodem tendit observatio de systemate,

B

phocarum

* Ita a plerisque aestimantur contenta, neque aliter mihi cessit experimentum; ventriculum sinistrum foeminae, 27 annos natae, materie ceracea implevi. Exesa carne, ceram sub aqua demersi, in vase cylindrico.

phocarum vasculoso *; harum pulmones dum, urinando, praedam exquirunt, aditum sanguini denegant. Hujus autem receptui comparantur sinus magni in venam cavam hiantes; partium etenim symmetria vetebat, ne ita ampliaretur cor, ut redundantem sanguinem intra se recipere possit.

Tota fere cordis compages est musculosa. Fibrae, fecus ac in aliis musculis, ramos emittunt, qui inter se confunduntur, ita ut illae extricatu sint difficillimae. Oriuntur ab annulis ventriculorum cellulosis; inde, oblique per faciem convexam versus mucronem tendunt, externe et interne magis rectae, in medio pene transversae. Ad apicem circa extrema ventriculorum glomerantur, et tenuiori strato redeunt ad basin cordis per faciem planam.

Vasa cordis propria Coronariae nuncupantur; quia, coronae instar, basi ejus circumdantur. Arteriae 2, dextra et sinistra, oriuntur ex aorta, supra valvularum terminum. Venae quatuor numerantur; coronaria magna, media, et vena auris dextrae: Hae, vagis quibusdam ramulis excep-

tis,

lindrico. Notavi altitudinem cui appulsa est aqua. Detracta cera, ut rursus eandem altitudinem attingeret, opus fuit ut infunderetur aquae $\zeta i. 3 vii.$

* Praelect. Monro:

tis, qui osculis hiant propriis, communi foramine, valvula instructo, aperiuntur in sinum dextrum, prope valvulam Eustachii.

Nervi, numerosi et saepius in gangliis intricati, derivantur a pare vago, sed praecipue ab intercostali.

Cor laxè a pericardio vestitur: Valida est membrana, quae, per vasa magna decurrens, cum cordis externa membrana continuatur. Inter faccos pleurae recipitur, ita tamen, ut ab iis fere in totum cooperiatur; sustentaculum cordi praebet, ne pondere ejus graventur vasa magna. Superficiem, ne assiduo contereretur motu, latice proprio, adipe cordis commixto, humectat. Indoles hujus laticis prorsus eadem est ac feri sanguinis, nisi quod plus lymphae coagulabilis continere videtur; sponte etenim cogitur.

Perstricta nunc descriptione praecipuarum cordis partium, breviter de situ earum in thorace differendum est. Facies plana fere horizontalis est. Septo transverso sinistra parte insidet, interposito pericardio, quod cum tendine septi connascitur; basis 4tae, 5tae, et 6tae vertebrae dorsalibus obvertitur. Mucro, intercapedine lobulorum pulmonis emergens, sextam costam, qua parte cartilaginosa evadit, percutit; sinus dexter totus fere sterni dexterior

terior est. Arteria pulmonalis, qua corde exit, medio ejusdem ossis obponitur.

S E C T. II.

De modo quo Cor formatur.

IN hac parte physiologiae cordis, meritas sibi laudes vindicat Hallerus, qui, fidelis naturae interpres, innumeras fere observationes fecit in ovis pullorum incubatis, his usus, utpote quae facilem ad foetum aditum praebent. Detecta ejus summatim enarrabo.

Cordis prima rudimenta apparent hora incubationis 38, rotundum aliquid e pectore prominens. Hora 42, guttulam rubicundam in eo moveri palam est. Paucis elapsis horis, tres in conspectum veniunt vesiculae, sinistri, scil. ventriculi et auriculae primordia, et aortae principium in bulbum tumefactum. Aliquantum distantes, intermediis canalibus nectuntur, quae ita inflexa sunt, ut parabolica oriatur figura, apice pectori obverso. Continenti moventur ordine vesiculae; vena cava sanguinem

in auriculam effundit, ope foraminis ovalis latissime hiantis. Die 3tia, altera auricula, et vertente die 4ta, prima accrescentis dextri ventriculi vestigia conspiciuntur. 5ta, stringi videtur foramen ovale, et manifestum fit inter auriculas discrimen. Die 6ta, evanescunt canales, auriculis ad cor applicatis. Eodem tempore, bulbus aortae, jamjam ad cor retractus, cum ventriculorum carne confunditur. Ex eo bulbo dudum ortae sunt tres arteriosae propaggines, in aortam dorsalem coadunatae. Harum altera est vera animalis aorta: Quae reliquae sunt, arteriae pulmonalis rami, statim ab origine bifidae; ea igitur duobus ductibus instructa est, ad aortam ducentibus. Neque enim statim apparent rami pulmonales. Venas pulmonum cum sinu sinistro commissas non nisi die octodecima cernere est.

Haftenus liceat historiam cordis ex pullis gallinaceis repetere: Neque enim plena exstat observatio de primaeva ejus in homine vel quadrupede fabrica: Multa vero indicare videntur, in his etiam, cor similes subire mutationes. Pergimus autem ad foetum humanum, qualis paullo ante partum invenitur, sanguinis vestigia adhuc prementes.

Omnibus

Omnibus innotescit, commercium inter foetum et matrem fieri per placentam, e laxa cellulositate, sanguine repleta, conflata. Ex hac orti ramuli venosi in truncum coalescunt, qui ad umbilicum foetus tendit, unde nomen suum fortitur; dein, sinum hepatis transversum petens, $\frac{1}{7}$ pars sanguinis continuo ad cavam defertur per canalem *venosum* dictum; qui reliquus est per hepar diffunditur, eodem delatus per venas cavas hepaticas. Sanguis ita cordi appulsus, pulmonem offendit immeabilem: A natura igitur comparatur foramen ovale, per quod magna sanguinis vis in sinistra cava divertitur; reliquus in arteriam transit pulmonalem. Hujus autem plus quam dimidia pars ad aortam directe fertur per *canalem arteriosum*. Post partum, obturatis arteriis umbilicalibus, major est renixus contra sanguinem in aorta, minor in pulmonali arteria, ob auxilia respirationis; hinc sanguis a priore cursu deflectitur; sensim, adplicata valvula, occluditur foramen ovale, atque, artificio naturae nondum satis perspecto, ductus arteriosus venosusque.

Necessitas duorum meatuum, inter cava cordis communicantium, patet; nam, pulmone fere immeabili, possumus tantum adfuisse ductum arteriosum: Tunc sinistra auricula, et exinde ventriculus, sanguinem tantummodo pulmoneum transmitterentur. Idem sequitur de ventriculo

culo dextro, si tantum adfuisset foramen ovale ; in priore rerum statu, sanguis dextrarum cavearum, in posteriore, sinistrarum, majorem ad reliquam massam haberet rationem, quam post pulmonis iter expeditum ; quod incommodum foret, constanti sua cordi figura.

S E C T. III.

De Cordis in diversis Animalibus Structura.

ITA necessarium ad vitae perfectionem videtur cor, ut vix ulla reperiatur animalis species in qua non adest : Exceptionem praebere videntur Zoophyta, Polypi, et quaedam testaceorum marinorum species. Sed haec ad naturam vegetabilem propius accedere videntur, cum vitale principium aequaliter per totam massam distribuitur, unde animal per furculos et taleolas propagatur. Attamen, in animalibus vel microscopicis, cor detegi potest. In vermicibus et plerisque insectis *, cylindraceum cor est vel multiplex ;

* In his motus valde abnormis. Mirum pulsationum describit

tiplex ; in omnibus nobilioris ordinis speciebus, unicum † ; in frigidis revera unicum ; in calidis duo auriculae et ventriculi in unum viscus coalescunt : Argumento sanguinis per pulmones transitum omnino esse necessarium ad caloris generationem. In piscibus plerisque, cor triangularem prismum refert, cui infidet bulbus aortae cartilagineus. In avibus, piscibus plerisque, et serpentibus, ventriculi interne laeves sunt, sinister in quibusdam cancellatus. In his, arteriae parum vel nihil differunt a venis, quoad tunicarum crassitiem ‡. In avibus, valvula dextris cavis interposita carnosae est et semicircularis. In omnibus quadrupedibus, quorum corpora inspiciendi data mihi copia est, ventriculus dexter minus robustus et torosus est, ratione ad sinistrum, quam in homine : In homine enim, risus, loquela, quae brutis nulla sunt, iter sanguinis per pulmones impediunt.

Pericardium

Euripum Malpighius in variis insectis ; De Bomb. p. 33. et seq. Lond. Ed.

† Solitaria, quantum novi, exceptione sepiae loliginis. In hac, demonstrante clariss. Monro, duo sunt corda, singulis pulmonum lobis prospicientia. Sanguis a pulmone redux, iterum per tertium cor in aortam projicitur.

‡ Harveius de mot. cor. cap. 17.

Pericardium omnigenis animalibus, quibus cor adest, invenitur; in piscibus quibusdam, et amphibiiis, durum est et fere cartilaginosum. In Raja batide, cavum pericardii, per canalem intermedium, aperitur in cavum abdominis. Hoc ipsum cum mari communicat, foraminibus duobus juxta anum positis*.

Progredimur ad motum cordis. Quae sub hoc capite dicenda veniunt, reduci possunt, imo, Ad phaenomena motus cordis; 2do, Ad ejusdem causas.

S E C T. IV.

Phaenomena motus Cordis

IN sequentes colliguntur propositiones †.

1. Pulsus partium cordis, itidemque arteriarum, aequalibus fiunt temporibus. Constat enim ex observatis, nu-

C

merum

* Monro Praeleſt.

† In his, nominibus *arteriae* et *venae*, intelliguntur vasa magna cor
adeuntia;

merum *systolē*, ideoque et pulsum, (per def.) in omnibus, dato tempore, esse aequalem. Constat quoque aequalibus peragi temporibus omnium *systolen*; idem de *diastole* verum est.

2. Eadem sanguinis quantitas, ab utroque ventriculo, *systole* sua, prodit. Patet ex praecedenti; aliter enim fieret congestio ad infinitum crescens, vel in pulmonibus et sinistro atrio, vel in caetero corpore et dextro.

COR. Dexter ventriculus non ad perfectam depletionem contrahitur.—Major enim est quam sinister; (p. 9.) Hinc facile explicatur quomodo polypi firmissimi in eo radice-
tur,

adeuntia; voce *atrium* designatur cavum ex venoso sinu et auricula conflatum, una cum iis venarum partibus quae iisdem, ac illa, agitantur motibus. Haec omnia communi fungi munere, patet ex absentia valvularum, si *Eustachianam*, fere nullam, excipias; item ex capacitate sinuum et auricularum, in quibusdam quadrupedibus, bove, v. g. multo minore ea ventriculorum. *Partes cordis* sunt atria et ventriculi. *Pulsus* est intervallum inter initium cujusvis *systoles* vel *diastoles*, et alterius, ejusdem partis, proxime sequentis. Pulsus partium *asynchroni* dicuntur, si in una, motus quivis, cum simili alterius, in totum semper alternat, quanquam sit tempusculum commune motui qui reliquus est in utraque; v. g. pulsus atrii et ventriculi in eodem fiunt tempore. Dividatur hoc in tertias partes. In prima, fiat *systole* atrii, in tertia, ventriculi. Pulsus *asynchroni* dicuntur, quanquam secunda sit communis *diastole*, utriusque cavi.

tur, citra cordis aneurysma, quod mihi, plus vice simplici, contigit vidisse. Ex fibrarum cursu, earumque robore, atque ex eo quod in animalibus subita morte oppressis, vacuus deprehenditur, denique ex analogia animalium frigidiorum, quorum cor, dextro ventriculo destitutum, inter contrahendum pallescit, jure concludere possumus ventriculum sinistrum, in systole sua, penitus exinaniri.

3. Tempus systoles ventriculi brevius est tempore diastoles; nam probabile est, tempore systoles ventriculi, velocitatem arteriosi sanguinis majorem * esse ea venosi, etiam resistente sanguinis massa; posito igitur, aream sectionis transversae venarum pulmonalium aequari areae eidem in aorta, positoque eandem sanguinis quantitatem atrio, tempore diastoles, infundi, quae ventriculo, tempore systoles †, expellitur; erint tempora motuum in ratione inversa velocitatum,

* Motus igitur arteriosi sanguinis fit per subsultus; media enim hujus velocitas, tempore pulsus, aequatur velocitati venosi; aliter fieret congestio in arteriis. Si nunc quaeratur quare non similis est motus venosi sanguinis? Respondendum est, quod quo longius a corde receditur, eo majorem habet rationem actio vasorum ad actionem cordis, ita ut tandem per illa sola perficiatur circulatio. Vid. quae ad pag. 41. 42. proponenda sunt.

† Ob defectum valvularum in limine atrii, hoc non accurate verum erit.

velocitatum, quibus sanguis per areas aequales fluit. Liqueat ergo propositum ex prop. 1ma et 2da. Ex observatis Keilii et Halefii tempus systoles ventriculi est $\frac{1}{3}$ totius pulsus.

4. Pulsus ventriculorum synchroni sunt. Patet, a. ex fibrarum ambobus communium intertextu; b. ex observatis; constat enim totam cordis molem aequaliter minui et augeri; sanguis quoque eodem tempore, resecto cordis apice, ex utroque ventriculo projicitur.

5. Pulsus atriorum synchroni sunt. Patet ex praeced. Aliter enim opus esset, ut alterum eorum in systole versaretur, tempore quo ventriculus ejusdem lateris, qui nullum igitur omnino sanguinem reciperet.

6. Pulsus atriorum et ventriculorum, inter se collati, sunt asynchroni; demonstratio praecedenti similis est.

7. Pulsus atriorum et arteriarum synchroni sunt. Patet ex prop. 6ta, et 1ma; asynchronos enim esse pulsus ventriculorum et arteriarum, valvulae semilunares demonstrant.

8. Cordis apex in systole ventriculorum sursum erigitur. Patet ex structura cordis. Constat enim, ventriculum sinistrum longiorem esse dextro; constat iterum amborum fibras esse continuas. Sequitur igitur in systole ventriculorum, dextrum ad se ducturum esse apicem praetergradientem

dientem focii; sed hic est apex cordis, qui ut erigatur necesse est.

9. Cor in eorundem systole brevius fit. Docet cursus fibrarum spiralis, quae aequaliter contrahi nequeunt, nisi ad invicem adducendo suos gyros. Suffragatur autopfia anatomicorum celeberrimorum. Duae causae contrariam invexisse sententiam videntur: 1. Cor in systole tenuius factum est; unde augeri videtur longitudo. 2. Cordis apex, in systole, revera protruditur, non quod cor elongatum est, sed quia antrorsum versus costas profilit, ut statim constabit.

10. Cor antrorsum in systole ventriculorum protruditur; nam per 6. dum hi in systole sunt, atria sanguine turgida illud nequeunt non promovere. Quoniam autem motus cordis vividus est et subitaneus, aliunde causa est petenda *. Valvulae triglochines, basibus suis cellulosum cordis ostium amplectentes, apicibus, carneis columnis appensae, per diastolen, parietibus ventriculi adjacent, et conicam figuram efficiunt, cujus cavum atrio obvertitur. Incipiente vero systole, sanguis irruens eas a parietibus cordis dimovet, citoque illae velum efficiunt, cujus pars convexa atrium spectat. Hoc igitur tempore, omnis sanguis, qui in cavo
conico

* Senac du Coeur.

conico contentus fuit, expellitur, idque motu velocissimo, ob vividam cordis contractionem. Arteriae quoque, et ob earum distentionem, et in rectitudinem nisum, symbolam suam conferre possunt. Praeterea, necesse est, sanguinem, vi corde expulsum, cor ipsum impellere vi aequali, at in directione opposita †.

Ita sese mutuo excipiunt motus in sano animali; at in moribundo, omnia fiunt abnormia. Sanguis minori vi ad atria adpulsus, quavis finuum systole in venas cavas et pulmoneas repellitur. Ventriculi, officii sui obliti, expectant donec multoties atria contrahantur. Primo deficit motus in ventriculo sinistro, dein in sinu cognomini. Exinde, eodem ordine, in dextris cavis. Tandem filet vena pulmonea. Ultima omnium auris dextra et vena cava ad quietem sese componunt: Dudum autem, praefertim in frigidis animalibus, in aeternum quiescere reliquae corporis partes, si intestina sola excipias. Neque vero illa, si modo rite instituatur experimentum, de vitae praerogativa cum corde contendunt. Sed neque perpetuas agit cor ferias; nam si aër in cava ejus, vel in pulmones immittatur, si vasa distrahantur, si calor, si stimulus, vel
mechanicus

† Hoc dudum ab amico meo Gul. Cleghorn, M. D. observatum est.

mechanicus vel chymicus, admoveatur, continuo redintegratur motus: Atque hoc, in frigidis quibusdam, aliquot horis postquam a thorace cor avellitur.

S E C T. V.

Causae Motus Cordis.

EX phaenomenis, vel perfunctorie consideratis, patet, cor esse musculum valde irritabilem, qui ad motum a stimulis variis excitari potest; haud igitur vero ab simile esset, supponere sanguinem, ei perpetuo adpulsum, stimuli vicibus posse fungi; omnibus praeditus est dotibus eorum, quibus, extra corpus, cor ad motum cietur: Vim habet distendentem, calidus est, denique salinus. Immo, per priores solummodo qualitates videtur, sanguinem quodammodo munere suo posse defungi †; aliquid vere praestare

† Vide historias a Lowero narratas, alteram juvenis haemorrhagia laborantis, atque a jussulis resecti, cujus sanguis indolem suam penitus amiserat,

praeſtare ſanguinem per dotes ſibi proprias, ſuadet pulſus lentus debiliſque a ſeroſa colluvie, incitatus ab ingeſtis acridis *. Sanguinem autem revera eſſe in cauſa motus cordis patet,

1. Analogia reliqui corporis. Glandulae ſuis ſuccis, inteſtina faecibus, veſica lotio diſtenta, omnia irritantur in contentorum expulſionem.

2. Ex phaenomenis ſanorum animalium : In plethoricis enim pulſus plenus eſt et validus, qui vividam et perfectam cordis contractionem ſignificat. Neque tamen inſciandum eſt, pulſum parvum, poſt venaefectionem celebratam, factum pleniorē, ſaepeſſime comitem ſeſe addere plethorae. Sed videndum eſt, fibras muſculares ita poſſe diſtendi, ut vim ſuam contrahendi penitus amittant ; exemplo veſicae urinae notiffimo.

3. Ex

amiferat, conſtante interim cordi motu ſuo. Alteram canis, cujus venis infuſa cereviſia, per aliquod tempus vices ſanguinis implevit.

* Hinc, atque ex ſympathia jamjam dicenda, quae cordi cum reliquis corporis partibus intercedit, dare forſan poſſumus rationem febris, chyli, puris, fomitis denique contagioſi abſorptioni ſupervenientis ; cum ex experimentis J. M. Regnaudot patet, paroxyſmum febrilem excipere infuſionem ſubſtantiarum vel mitiſſimarum in maſſam ſanguineam. Vid. Diſ. Inaug. de Chirurg. Infuſ. renov.

3. Ex phaenomenis moribundorum, post nimiam sanguinis jacturam: His enim, prout sanguis disperditur, actio cordis elanguescit. Comprime venas, ut novae accedant suppetiae, motus refocillatur; iisdem indito ligaturas, sensim fit debilior, neque post longum tempus cessat †. Hinc videre est cur, instante morte, auricula multoties contrahitur, dum ventriculus quiescere videtur; parcum enim sanguinis penu auriculae immissum, non sufficit ad plenam ventriculi, carnosioris utpote, contractionem suscitandam. Patet iterum, cur vita in dextris cavis haereat. Haec enim ultimo sanguis adit coadunatus per frigus externum, vel motus musculorum convulforum, dum circuitus per pulmones, dudum immeabiles, cessavit. Res experimento confirmatur; nam si, ligatis venis, obtinueris ut sanguis ad sinistras caveas, diutius quam ad dextras, adpellat, illis una cum stimulo transfertur diuturnioris vitae privilegium ‡.

Unde nunc cordis diastole? Ad legem naturae recurrendum est, qua muscoli, stimulo amoto, sponte laxantur. Nam neque fibrae rectae, quae nullae sunt, diastolen efficere

D

possunt,

† Senac. du coeur, T. I. 316. Hall. El. Phys. T. I. 60.

‡ Perseverantia cordis in motibus suis, postquam a thorace evellitur, tribuenda est stimulo aëris, post spontaneam laxationem irruentis.

possunt, neque unda irruentis sanguinis; cum, in vivis animalibus, laxari conspicitur priusquam sanguis adpellat.

Perspecto nunc sanguinem stimuli vicibus fungi, restat ut inquiramus, unde cor suam fortitur irritabilitatem? Ex analogia muscutorum voluntati infervientium, pronum esset cogere vim cordis contractilem a cerebro nervisque pendere. Multa vero in contrariam excitantur partem; eis paullisper immorabimur.

Objicitur, imo, Cor supervixisse musculis, quibus proficiunt nervi multo majores et numerosiores quam cardiaci; illius igitur fibris inest causa motus, alibi non reperiunda.

De nervis cor adeuntibus, jamjam dicendum est. Interim observare liceat, energiam nervosam, in quacunque corporis sede, magna ex parte pendere ex intima eorum divisione, atque ex eo quod fibrillae ultimae, nudae, stimulo subjiciantur; neque alio cum consilio videtur interna ventriculorum superficies jugis innumeris cancellari, quam ut, in musculis necessario crassis, late patens tractus actioni sanguinis exponeretur †.

Objicitur,

† Confer quae ad pagin. 16. dicta sunt; ex quibus elicitur hac structura vim ventriculorum pendere.

Objicitur, 2do, Cordis motus superesse in fomno, in apoplexia, cum sensus et motus voluntarii penitus periere, cumque ideo sensorium munere se suo abdicat. Immo eundem motum persistere post encephalon frustatim sectum fuit. Qui haec objiciunt, ponunt energiam nervosam, qualiscunque demum sit, a cerebro, veluti a fonte scaturire, atque exinde per nervos quasi per canales quosdam derivari. Numerosissima autem extant exempla motuum, vel voluntariorum, superstitum post encephalon penitus destructum. Extant quoque animalia, quibus cerebrum et spinalis medulla nulla sunt. Immo, in homine ipso, haud rarae sunt historiae foetuum crescentium, et cibum captantium, quibus ambo haec organa penitus defuere. Sed et clariss. Monro demonstrat, nervos, ad ultimos usque ramulos, piam matrem induere, et structura qualis est encephali gaudere. Ex hisce jure cogimus, nervos ipsos, energiam qua ad motum apti redduntur muscoli, per se suppeditare posse.

Objicitur, 3tio, Cor sensu duntaxat obtuso esse praeditum. Ita probare videtur experimentum, quo in homine cor contrectatum fuit, citra dolorem. Sed, ut probabilem pericardii accretionem omittam, sufficit, si internis cordis partibus sensus concedatur. Ita vero rem
se

se habere, fuadet dolor in angina pectoris †, in rupto cordis septo, vividissimus.

Objicitur, 4to, Irritando cordis nervos cor non in motum fuscitari. Ad haec jam responsum est (2.). Addi potest, ita latissime patere nervi intercostalis anastomoses, ut, ubicunque in vivo animali stimulus admoveatur, vix dimidia pars nervosae substantiae, cor adeuntis, illi subji-
cietur.

Restat ut ex phaenomenis directe eliciatur probatio cordis motus ab energia nervorum pendere. Et, primo, observamus nervum intercostalem, priusquam cor adit, propaginibus a tredecim aliis auctum esse. Commissuris ganglia interponuntur, plexusque miro cum artificio intertexti sunt: In his, demonstrante clariss. Monro, fibrillae nerveae ita sunt intricatae, ut, si quid patiatur quivis nervorum, incommodum omne in viscere punctum aequaliter participet. Quorsus haec naturae sollicita cura, si nervi vix aliquid ad motum cordis conferant?

2. Cordis

† Cor etenim in hoc morbo saepius spasmo tentatur. Vide MacBride, *Introd. to Theory and Practice of Physic*. Idem comprobat historia, quam juris publici facturus est amicus meus J. Young, M. D. in actis Soc. Reg. Med. Edin. Confer quae ad pag. 29. dicenda sunt de sympathia quae cordi cum reliquo corpore intercedit.

2. Cordis motus ab animi affectibus magnopere turbatur, vel etiam subito sufflaminatur. Hi in gluten musculorum nil possunt.

3. Quae motus voluntarios et sensus in viventem animali compescunt, cordis corpore avulsi motus inhihent, e. g. opium.

4. Latissime patet inter cor et reliquum corpus sympathia, quae nil potest, nisi per nervos. Stimulo stomachum excitante, continuo vividior fit cordis in sanguinem impulsus; a corde contacto syncope; solutione opii per venam cavam, cordi ranae immissa, motus omnes voluntarii inter octo minuta periere. Ne opium in musculos proxime agat, vetabat resecta aorta. Huic vero minime tribuenda est subitanea mors, cum notissimum est, id genus animalia cordis evulsioni aliquot horas supervivere*.

5. Plurimae causarum quae syncopen inducunt, in vim nervosam primario agunt. Hujusmodi sunt, quae cerebrum debita sanguinis quantitate privant; haemorrhagia vel modica, si situs sit erectus; aquarum hydropicarum subitanea effusio. 2do, Quae vi nervosae, modo prorsus ignoto, efficiunt; aura electrica; dolor subito remissus; nausea; graveolentia; fomes febrium contagiosus.

Perspecto

* Monro Praelect.

Perspecto nunc cordis motum, aequè ac motus voluntarios vi nervea pendere; restat ut inquiramus, quomodo haec vis in actionem cietur; anne per causas mechanicas, vel ex imperio animi sentientis? Invitus in arenam periculosam descendo, et facile dabo; mentem humanam saepissime ad causas ultimas confugere, ob id, solummodo, ut velum ignorantiae suae praetendat: Cum autem video quam misere hallucinati sunt, qui fibrae moventis phaenomena ad leges mechanicas revocare aggressi sunt, cumque iterum considero, motus animales, data causa physica, saepissime, ratione ad causam, ut dicitur finalem, variari, vix temperare possum, quin cum viris clarissimis sentiam, quod mirandam corporis viventis machinam

‘ Spiritus intus alat, totamque infusa per artus,

‘ Mens agitet molem.’

Si nunc quaeratur, quare cor, a motu rapidissimo, ne vel per momentum ferians, nunquam defatigetur? Aliquid forsan potest ejus fabrica, analogia muscutorum linguae; causa vero praecipue petenda videtur ex eo, quod citra volentiam peragitur motus; eadem nempe lex in mentis actione valet. Cum enim, per somnum, vel a cogitatione ferianti, ideae citra voluntatem menti obversantur, vix

ullam

ullam patitur defatigationem. Attamen, cum, contemplationi intenta, haeret obtutu defixa in uno, cito vires deficiunt.

S E C T. VI.

De Vi Cordis.

AD vim cordis, arte geometrica, determinandam, plurimi animos appulere; irrita autem plerumque opera, quorum utpote ratiocinia principiis innixa sunt, ab oeconomia animali prorsus abhorrentibus †. Hujuscemodi autem vitio prorsus carere videntur calculi Keilii et Halesii. Eos breviter adtingere liceat.

Si quantitas sanguinis, quavis systole a sinistro ventriculo expulsa, dividatur per aream aortae, habetur cylindrus, cujus altitudo est spatium tempore systoles a sanguine percursum. Hoc spatium ductum in numerum pulsuum, dato tempore, dat totum spatium

† Borellii aliorumque calculi primo intuitu rejiciendi sunt; si enim agat cor vi 180,000 lb. necesse est, ut renisu sanguinis incitatum (Sect. 4. prop. 10.) claustra thoracis perumpat.

tium hoc tempore percursum. Cum autem tempus systoles $\frac{1}{3}$ pars est tantummodo totius pulsus, factum triplo est augendum, si desideretur spatium per id tempus descriptum, ea velocitate, qua corde sanguis exit. Hoc aequabitur 156 ped. in minuto primo. Ita habetur sanguinis velocitas, cum, cursu suo, resistitur a massa antecedente. Si haec resistentia amoveatur, augebitur velocitas sanguinis, qua autem ratione, modo frequente elicitur. In animali illaeso, quantitates sanguinis per arteriam, venamque sociam, dato tempore, transeuntes, aequales sunt. Aliter fieret accumulatio ad infinitum crescens, vel in corpore vel in corde. Si igitur transverse secetur vena, quantitas effusa, dato tempore, eandem habebit rationem ad quantitatem, eodem tempore, comite arteria, similiter secta, effluentem, quam habet velocitas sanguinis in illaesa arteria ad velocitatem qua flueret, omni impedimento remoto. Ratio invenitur $3 : 7\frac{1}{2}$; longitudo igitur praedicta augenda est ad pedes 390. Hoc modo comparata sanguinis velocitate, vis qua corde exit per theorema Newtonianum * elicitur, aequatque, secundum Keilium, $\frac{3}{4}$.

Sim-

† Sc. vis tota qua fluidum foramine quocunque exit, aequatur ponderi prismatis fluidi, cujus basis est area foraminis, altitudo vero dupla illius altitudinis, qua cadens fluidum velocitatem qua effluit ad-

Simplicissimam exquisivit Halefius viam, qua vis cordis aestimaretur. Tubum carotidi arteriae transverse sectae plurimorum animalium, homine, et grandiorum et mino-

E

rum,

quireret. Quoniam autem a plerisque recentioribus rejicitur Newtoni demonstratio, utpote quae principiis innititur, experimento nullo modo confirmatis, haud importunum videtur subungere aliam, qua in praelectionibus suis utitur Joannes Robison, Ph. nat. in Ac. Ed. P. vir, qui praeter clarissima inventa, quibus vim electricam atque magneticam ad principia physica primus revocavit, nullam non partem scientiae suae novis detectis auxit. Fiat foramen, v. g. circulare in vasis pariete, a superficie fluidi contenti 16 pedes verticaliter distans; experimento patet, omnibus rite comparatis, aquam per foramen effluere velocitate ei communicata ex casu per eandem altitudinem: Hoc est, velocitate 32 ped. in minuto secundo. Hoc igitur tempore effluet cylindrus aquae, cujus basis est foramen, longitudo vero 32 ped. idque ea velocitate, qua in minuto secundo percurruntur ped. 32. Ponamus nunc, talem cylindrum congelare, atque per altitudinem 16 ped. cadere. Constat, casum huncce, tempore minuti secundi peragi, et ad finem casus, velocitatem adquiri qua percurruntur 32 ped. in minuto secundo.

Eadem igitur motus quantitas fluido communicatur vi expulsionis, quae communicatur, eodem tempore, gravitate cylindri, mensurae praedictae. Cum autem, qualiscunque demum sit machina, fluidum expellens, semper inveniri potest in vase altitudo, quae velocitati, qua fluidum ex illa effluit, competit, patet generalissimam esse demonstrationem.

rum, infixit. Altitudines notavit, quibus sanguis in eo attingebat. Media sumpta, eam in hominum ad 7,5 pedes aestimabat. Haec ducta in superficiem ventriculi sinistri, dabat lb 50,5; sive, pondus columnae sanguinis quam sustinebat ventriculus sinister, uti ex hydrostaticis patet.

In Keilii calculo, quaedam forsan emendari possunt. Et, imo, positis ipsius principiis, nimis parvam statuere videtur rationem quam habet velocitas, qua libere a corde flucret sanguis, ad eam qua fluit, systemate arterioso distento. Arteriam enim iliacam resecurit, ubi verisimile est, multo minorem esse velocitatem quam in aortae principio. Similem ob causam, nimis magna habetur venosi sanguinis velocitas, quae adhuc nimia erit, ob luctamina vexati animalis, cui magis acceleratur motus venosi sanguinis, quam arteriosi. Accuratus forsan elici potest ratio ex experimento Haleii. Infixit ille tubum venae internae jugulari equae, et deinceps carotidi arteriae. Ex hac ascendebat sanguis circiter 9 ped. ex illa, 1. Momenta ejus igitur in utroque erint in hac ratione; et velocitas liberi effluxus ex arteria, ipso cordis systoles tempore, ad velocitatem in vena † in ratione subduplicata. Nam ponamus, diversis hisce momentis, sanguinem libere effluere e pariete

† In animale illaeso, vix resistitur sanguinis motui in vena jugulari.

riete vasis per foramina aequalia et similia: Erint velocitates in ratione subduplicata distantiarum a superficie fluidi; hoc est, per prop. pag. 33. momentorum ipsorum, scil. ut 3 : 1; quae ratio est ad Keillianam ut 5 : 6 *. Augendum est igitur spatium ad pedes 468, in min. prim. haec dat ped. 7,8 in minut. secundo, quo tempore corpus libere cadens percurreret pedes 32,2 post casum ped. 16,1. Cum igitur spatia sint in ratione velocitatum duplicata, erit 1036,84 : 60,84 :: 16,1 : 0,94. Hoc spatium duplicatum tuto ad pedes 2 aestimari potest, cum sanguis venosus jam detractus vires arteriarum minuisse necesse est, eademque ac in calculo primo aliquatenus tenent, (p. 34.) Poll. igitur $24 \times 0,4187$, aream sc. aortae, dant cylindrum, qui, si sit sanguineus, aequipolleret $\frac{3}{4}$ vj, 1. Hoc pondus vim mensurat qua sanguis corde exit. Eandem esse vim cordis ipsius Keillius statuit. Sed facile ex hydrostaticis patet, pressuram quam sustinet interna cordis superficies a fluido, tali vi exeunte, aequari ponderi solidi sanguinei ex altitudine casus, sc. ped. 1. in internam ventriculi superficiem = poll. quad. 15. † ducta ‡. Mensura igitur totius vis
cordis

$$* \frac{3}{7 \frac{1}{2}} \text{ enim } = \frac{2}{5} = \frac{6}{15}, \text{ et } \frac{1}{3} = \frac{5}{15}.$$

† Ex mensura Halefii.

‡ Supponamus enim cor situm esse apice sursum spectante, axisque
verticaliter

cordis erit lb. vjj. q. p. † quae est ad vim in calculo Halesii ut 1 : 7,3.

Hicce autem calculus principiis innititur nullo modo inter se convenientibus. In prima enim parte ponitur systolen esse $\frac{1}{3}$ totius pulsus, hinc sequitur (Prop. 3.) velocitatem arteriosi sanguinis, non obstante sanguinis massa, ipso tempore cordis systoles, majorem esse quam venosi, contra quod in sequente calculi parte assumitur; cum vero tempus systoles difficillimum sit observatu, cumque etiam hoc comperto, nequit ad amissum definiri ratio quam habet velocitas in aorta ad velocitatem qua atrium sanguis ‡ intrat, patet, calculum hujuscemodi nequaquam sufficere ad exploratam rei notitiam.

Quod ad calculum Halesii attinet, probabile est eum
indicare

verticaliter posita, atque aortam ita esse inflexam, ut hinc parallela ascendat; impleatur cor sanguine, fiatque systole. Sanguis exhibit velocitate comparata per casum liberum ped. 0,94, seu potius ped. 1. Constat igitur, sanguinem ad hanc in aorta altitudinem ascensurum esse. Pars igitur ventriculi, lumini aortae aequalis, eique obposita, pressuram sustinebit aequalem ponderi columnae, cujus basis est aortae lumen, altitudo vero ea jam dicta. Haec pressura in sanguinem, indeque quaquaversus, aequalibus ventriculi superficiebus propagatur.

† In ambobus calculis, vis nimis magna habetur ob internam superficiem ventriculi, ad finem systoles imminutam, qua autem ratione, non patet. Poll. sang. cubic. = 267,7 gr. Hales haem.

‡ Prop. 3. N. 2.

indicare pressuram majorem, ea quam sustinet cor, quum lege naturali contrahitur; tubo enim in arteria infixo, columna sanguinis exitus nescia, cor praegravat, et systolen perfectam impedit. Itaque continuus fit canalis arteriam inter venasque cor adeuntes.

Hinc, cum ascendit sanguis, elevatur non tam vi cordis ipsius, quam arteriarum, et venarum, sanguinem e pulmonibus valida expiratione compressis reducentium, quibus iterum largissimae feruntur suppetiae a partibus remotissimis, musculis, contractione sua abnormi, sanguinem in dextras cordis caveas coadunantibus*.

Ita rem se habere, suadent quae in experimentis ipsis accidere. Post singulum enim cordis systolen, sanguis 2. vel 3. pollices tantum ascendebat; attamen cum luctabatur

tur

* Quae hic observantur, quibusdam forsan nimis alte repetita videbuntur; at, comperta velocitate qua sanguis in vasa horizontalia libere irrueret, ad initium temporis quo ab altitudine 3. ad eam 4. pedum, [Hales haemaf. ex. 3.] elevabatur in tubo verticali, atque ratione habita imminutionis velocitatis in systemate sanguifero, calculo inito inveni, quantitatem sanguinis, isto tempore, illis vasis infusam, majorem esse solidis ipsius ventriculi contentis; ea, igitur, a corde solo suppetitari non potuit. In tali calculo, multa esse admodum incerta necesse est; attamen, si a quopiam instauraretur periculum, operae esset pretium inquirere, num ipso tempore ascensus sanguinis valida ageretur cor contractione.

tur animal, statim elevabatur ad pedem et ultra, idque quanquam sanguis fere in totum disperditus erat. Patent eadem ex dissectione equae, (Haemast. exp. 1.) in qua venae cavae sanguine turgebant, dum reliquum corpus fere exangue fuit. In ventriculo autem sinistro inventa est $\frac{3}{4}$ sanguinis, contra quod fit, cum animal naturali fato functus est.

Cum autem in utroque calculo †, multa elementa adhuc incerta sunt, transeamus ad phaenomena cordis vulgatiore, si qua, ex eis, rudi quanquam conjectura, vim ejus aestimare possumus.

Quidam, perpenſis cauſis quae ſanguinis motui adverſantur, immenſam eſſe vim cordis ſtatuere. Inter has, minimae ambiguae ſunt ſanguinis natura coagulabilis, frictio quam ſubit in ramulis arteriolorum pene infinitis, quorum diametrorum ſumma, diametrum trunci ſui ſemper excedunt; anastomoses angulique vaſorum, et flexiones variae; maſſa denique humorum circulantium quae lb. 50. utcunque exaequat. Hujusmodi autem argumenta nimis probant; nulla etenim analogia concipere poſſumus, vim ita prodigioſam in muſculo tam parvo ſitam eſſe. Omisſis autem talibus ratiociniis, ad naturam ipſam provocemus. Quaestio in hoc vertitur, ane ſententia vera eſt, cor per ſe maſſam circulantem promovere? Hoc ſi comprobent

† Pag. 36. et N.

probent experimenta, frustra inficias ibimus rem utcunque incredibilem.

Huic se sententiae totum se addixit Hallerus, atque ejusdem strenuus evasit propugnator. Vix autem satis firmæ videntur conclusiones quas ex phaenomenis quæ recenset, colligit. Efficacia enim aneurýsmatum in sterno, &c. dimovendis, facile explicatu est, quanquam ponamus vim cordis esse modicam, cum per longum tempus adeo indefinenter agat. Quod ad pondera ictu cordis sublata, aliquid saltem tribuendum est musculis thoracis, conspirantibus, citra volitionem, ad vim functioni vitali nocituram amoliendam. Pressura aëris nulla est, cum cor ipsum et interna superficies thoracis, aequæ ac externa, ejus pondere premantur, et si revera, in distensione arteriarum, moles corporis augetur, unda aëris tantummodo, ob elasticitatem atmosphaeræ, facilis excitatu, cietur. Sanguis ex arteria capillari saltus nequaquam cordi tribuendus est; nam, notante celeb. Monro, distensio totius arteriosi systematis, non fit in omni parte, eodem tempusculo; hinc, cum capillaris arteria distenditur truncus ex quo oritur, in systole versari potest. Quæ vitam denique animo linquentibus reddunt, nequaquam in cor solummodo, sed in totum systema vasculosum, aequaliter agunt. Dimissis igitur argumentis
quæ

quae cordis vim ita in immensum extollunt, consideremus quae in alteram partem adduci possunt.

In piscibus plerisque *, cor simplex est, et satis parvam habet ad reliquum corpus rationem. Sanguis vero in iis triplicem perficit circuitum, per branchias, per systema aortae, venaeque portarum. Hinc jure cogitur, alias dari circulationis vires, quam quae a corde suppeditantur. Dantur autem species, in quibus nullum omnino cordis vestigium apparet †. Sed fallax potest esse analogia frigidorum animalium, quibus aliud vitae genus, alia humorum circumeuntium ratio quam in calidis; attamen in his, multa exempla, mecum facientia, suppeditat historia monstrorum. Duo tantum citabimus, a recentioribus observata. Alterum foricis adulti, in quo vicem cordis supplebat substantia auriculam quodammodo referens. Venae pulmonales in aortam coaluere, haud aliter quam in piscibus ‡. Alterum foetus humani, ab Hewsono perlustrati, in quo nullum omnino cor inventum est; sanguinis tamen circuitu per arterias venamque umbilicalem

* Praelect. cl. Monro.

† V. g. Echinus marinus. Mon. prael.

‡ Van Swict. Com.

umbilicalem peracto †. Huc quoque referenda sunt observata de morbis cordis. Illust. Senac ipse vidit ventriculum finistrum in substantiam osseam conversum, plurimaeque aliorum observata refert, qui testantur cor inventum fuisse friabile, gangraena correptum, immo penitus absumptum. Tamen hisce sub malis, vita per aliquod tempus sine magna molestia tolerabatur. In piscibus denique vi vasorum sola promoveri videtur lymphæ, cum parum vel nihil possint valvulae, ad receptacula positaë. Ex hisce omnibus colligitur, sanguinem cursum suum, quodammodo, perficere posse sine cordis impulsu, ideoque hujus vim nequaquam mensurari posse per illius resistantiam; atque adeo calculum omnino esse phaenomenis consentaneum, qui istam paucis libris æquipollere ponit.

Hoc autem adhuc amplius patebit consideranti, totum systema sanguiferum, aequè ac cor, vi gaudere muscolari. Secetur carotis viventis animalis. Brevi, sanguis rivo graciliori projicietur, et post mortem diameter minor erit quam in focia arteria. Simili vi praeditas esse arterias minimas, innumera comprobant. Inflammatio topica; glandularum secretiones auctae, vel etiam immutatae ex

F

irritatione

† Acta Philos. ann. 1775. p. 2.

irritatione topica, immo ex animi affectibus. Experimenta denique a claris. Monro instituta, quibus ope microscopii observavit, vasa, in vulnere semicicatricato, sanguinem effundere, admoto S. CC. aqua diluto. Venarum quoque tunicas esse musculares, evincunt experimenta Verschuiriana. Huc quoque pertinet, quod inflammationi sunt obnoxiae. Si quis nunc animo perpendat, quantum valere potest vis musculosa, utcunque parva, longissimo vasorum tractui insita, facile perspiciet quomodo sanguis per ambages vasorum, vel maxime tortuosas, promovebitur. Analogiam minime obscuram praebet canalis alimentarius.

S E C T. VII.

Cordis Usus.

CONSIDERATIS nunc phaenomenis atque causis motus cordis, vique qua praeditum est, aliquid forsitan de ejus usu statuere poterimus. Quanquam igitur falsi sunt qui
adfirmant,

adfirmant, illud esse quasi elatera, quae machinam sanguiferam, per se inertem, agitare, omnino non est dubitandum, quin nobili admodum fungatur munere. Et, imo, Sanguinem notabili satis vi promovet; patet ex vulneribus quae, si in sinistra parte fiant, sanguinem, brevi, magno cum impetu effundunt.

Cor eandem habere videtur rationem ad systema sanguiferum, ac cerebrum ad systema nervosum. In plantis, in zoophytis, nulla cerebri, nulla cordis species. In insectis plerisque, cor in arteriam, cerebrum in nervum migrare videtur. In frigidis animalibus, detruncato capite, avulso corde, nervi et vasa in munere suo obeundo, per notabile spatium perseverant; at, in perfectioribus, si injuria gravior vel cordi vel cerebro sit illata, cita mors subsequitur. In humano genere, ita arctum est inter cerebrum et cor commercium, ut hoc mirum in modum afficiatur, statim ac ideae, vel desiderium vel aversionem cientes, menti obversantur. Hinc quidam animi affectus cordis motum vel sufflaminant vel praecipitant: Turbae in reliquum systema propagantur, perspiratio impeditur, et secretiones abnormes fiunt. Alii vero vim nervosam debita quantitate ad cor derivant, atque ita sanitatem conservant. Merito igitur hos secundum naturam esse, illos vero
contra

contra naturam, affirmatur. Ita nova eruitur sanctio legum quibus animo moderamus *.

Sed ut ad physica redeamus. In animalium primordiis, cor et cerebrum conspicua sunt, antequam vel vasa vel nervi in conspectum prodeunt, ambo maximae molis, pro rata corpusculi nascentis. Illius esse videtur vasa evolvere et particulas nutrientes promovere; hujus, istas in naturam animale permutare. Hinc cor, in grandescente pullo, summopere irritabilis, et quo magis vivida ejus actio, eo celerius incrementum. Hinc per totum incrementi stadium, et cor et cerebrum, pro portione caeterarum partium, maxima sunt.

2. Cor igitur facere videtur ad corporis grandescantis molem. Huc pertinere videntur a Malpighio observata. Sub initium enim finemque bombycis in chrysalidem metamorphoseos, crebris agitur cor pulsibus. In ea quoque mutatione, penitus invertitur cordis motus. In primo enim vitae stadio, motus a superiore ejus termino ordiebatur; at in aurelia, ibidem finitur. *De Bombyce, p. 25. et seq.*

Nonne

* Qui plura de hoc argumento vult, adeat Cumberland de leg. Nat. cap. 2. §. 26. Qui tamen ex structura partium conclusiones cogit, hominariae anatome minime consentaneas.

Nonne eodem quoque tendit historia pueri, haemoptoen saepius passi, qui inter 41 dies lineas 13 creverat *? Post obitum, cor mirae molis inventum est.

3. Omnino necessarium videtur, ut sanguis venae cavae superioris, chylo refertus, cum reliqua massa confundatur; hinc merito inter usus cordis recensetur, conquassare sanguinem, ut partes heterogeneae penitus commisceantur. In hunc finem, juga atque cancelli parietum pulcherrime aptata sunt.

* Hall. op. min. T. 2.

Nonne eodem quoque sensu hinc et inde
 facinus patet, quod inter 41 dies linearis et curvatus
 obitum, cor nunc nolis invenitum est.

3. Ovario accessum videtur, ut sanguis venae crassae
 superstitis, chylo repletis, cum salibus nulla coagulatione
 totum hinc exitio inter vasa cordis recedat, conglutinetur
 stagnentem, ut pariter hinc et inde pervenit, conglutinetur.
 In hunc finem, iuga supra cancelli pariter pulcherrime
 aperta sunt.

4. Ovario accessum videtur, ut sanguis venae crassae
 superstitis, chylo repletis, cum salibus nulla coagulatione
 totum hinc exitio inter vasa cordis recedat, conglutinetur
 stagnentem, ut pariter hinc et inde pervenit, conglutinetur.

5. Ovario accessum videtur, ut sanguis venae crassae
 superstitis, chylo repletis, cum salibus nulla coagulatione
 totum hinc exitio inter vasa cordis recedat, conglutinetur
 stagnentem, ut pariter hinc et inde pervenit, conglutinetur.

6. Ovario accessum videtur, ut sanguis venae crassae
 superstitis, chylo repletis, cum salibus nulla coagulatione
 totum hinc exitio inter vasa cordis recedat, conglutinetur
 stagnentem, ut pariter hinc et inde pervenit, conglutinetur.

7. Ovario accessum videtur, ut sanguis venae crassae
 superstitis, chylo repletis, cum salibus nulla coagulatione
 totum hinc exitio inter vasa cordis recedat, conglutinetur
 stagnentem, ut pariter hinc et inde pervenit, conglutinetur.

8. Ovario accessum videtur, ut sanguis venae crassae
 superstitis, chylo repletis, cum salibus nulla coagulatione
 totum hinc exitio inter vasa cordis recedat, conglutinetur
 stagnentem, ut pariter hinc et inde pervenit, conglutinetur.

